

26 APR 2004

Wanita Malaysia-AIDS

MALAYSIA BERI TUMPUAN KEPADA WANITA DALAM USAHA MEMERANGI AIDS

Oleh: Neville D'Cruz

MELBOURNE, 26 April (Bernama) -- Walaupun Kementerian Kesihatan Malaysia memberi sokongan padu terhadap kempen memerangi HIV, tetapi agensi kerajaan lain agak lembap dalam menerima hakikat bahawa AIDS bukan sekadar masalah perubatan, kata Presiden Majlis AIDS Malaysia Datuk Marina Mahathir, hari ini.

Marina yang turut membentangkan kertas kerja pada Persidangan Dunia Mengenai Penggalakan Kesihatan dan Pendidikan Kesihatan yang bermula di sini, berkata pemberian hak dan pendidikan kepada wanita serta menawarkan kepada mereka pilihan dalam menjalani kehidupan merupakan antara kaedah yang digunakan oleh Malaysia untuk memerangi penyakit AIDS.

Marina berkata pengetahuan tentang risiko yang mempunyai kaitan dengan penyakit itu sahaja tidak memadai untuk mengubah tingkah laku wanita.

Wanita, terutama yang muda, menjadi tumpuan dalam usaha mengurangkan kadar kes HIV positif di negara masing-masing, kata Marina.

Beliau berkata walaupun jumlah wanita tidak sampai 1,000 daripada 57,000 kes yang dilaporkan, namun kadar jangkitan di kalangan mereka meningkat lebih pantas daripada lelaki.

"Banyak yang telah kami lakukan untuk memperjuangkan hak dan pilihan bagi wanita selain mengadakan ceramah kesihatan kerana mereka menghadapi masalah untuk mendapatkan maklumat yang realistik.

"Sejak sekian lama, wanita tidak tahu mereka terdedah kepada penyakit itu. Kami cuba buka mata mereka kepada hakikat bahawa wanita amat terdedah kepadanya kerana mereka hanya mengharapkan agar lelaki menggunakan kondom," katanya kepada akhbar Age di sini.

Walaupun kondom boleh didapati dengan mudah di Malaysia, tetapi ramai yang enggan menggunakannya, kata beliau.

"Ada yang berpendapat penggunaannya tidak dibenarkan oleh Islam atau ia tidak memberi keseronokan," katanya.

Kepercayaan bahawa penggunaan kondom tidak dibenarkan oleh agama merupakan suatu anggapan semata-mata dan kami sedang berusaha memberi kefahaman kepada mereka bahawa ia tidak menyalahi ajaran agama, kata Marina.

-- BERNAMA

NDC SHE SP PR